

Напалкова Кристина Ивановна

Вөр-ва.

Миянӧс быдлаті кытшовтӧ вөр-ва. И кажитчӧ, мый сійӧ помтӧм-дортӧм. Видзӧдлам кӧ вӧрас, то ми аддзам сэтывь зэв уна пу, тусь, тшак да сідз водзӧ. А кутшӧм мичаӧсь пуясыс вӧрын! Босьтам кӧть кыз пу. Сійӧ сулалӧ быттӧ мича нывбаба, а козьяс сулалӧны быттӧ ён багатырьяс.

Миян ӧні ывла вылын ар. И видзӧдлыны кӧ вӧр вылас, а ещӧ бурджык пыравны сэтчӧ, то дзик пыр син улад шыбитчӧны сэтшӧм мича турунвиж, кольквиж да гӧрд корьяс пуяс вылас. А кор тӧвруыс кыптыштас да кутас ворсӧдчыны корьяснас, сэки найӧ зэв кокныдика, йӧктігтыр да ӧтарӧ-мӧдарӧ качайтчӧмӧн кутасны усьласьны му вылӧ. И муыс лоӧ быттӧ уна рӧма джодждӧра.

А тулыснас вӧрын кымын мичлуныс! Сылӧ лым, сьылӧны лэбачьяс, и заводитӧны визувтны гажа шорьяс. Пуяс вылын мыччысьӧны веж, сӧмын на артмӧм турунвижсьыс турунвиж корьяс.

Но меным вӧрыс воӧ сьӧлӧм вылӧ ёнджыка тӧвнас. Ӑд сэки пуяс пасьталӧны еджыд, мича платтӧ. Кажитчӧ, быттӧ ачыс Мороз пӧль ветлӧдлӧ да мичмӧдӧ быд пу, кодӧс аддзас туй вывсьыс. Ставыс лоӧ еджыд да мичасьыс мича. Быттӧ мойдӧ веськалан, сэтшӧма гӧгӧрбок вежсьӧ. Видзӧдлыны кӧ пелысь пу вылӧ, то сылӧн тусьясыс розйӧн ӧшалӧны, корӧны ас ордас ветлысь-мунысьяссӧ. Сэтшӧм бура найӧ тыдалӧны еджыд вылад, быттӧ ичӧт бипурьяс лӧсталӧны. Со кытыськӧ лэбис пелысь дорӧ жонь, пуксис пу вож вылӧ да кутіс чӧсмасьны чӧскыд тусьнас.

Со эськӧ кӧ став йӧзыс аддзыласны тайӧ мичлунсӧ! Сэки эськӧ быдӧнлы вӧр-ваыс пыр жӧ воас сьӧлӧм вылас. И сэки некод оз кут вӧчны вӧрыслы некутшӧм лӧктор. Оз кутны шыблавны быдлаӧ лӧп-ӧгсӧ, оз кутны чегьявны пуяслысь вожьяссӧ, оз кутны пӧрӧдны уна вӧрсӧ да виявны звер-пӧткасӧ... И миян олӧмным вежсяс бурланьӧ. Оз ӧд прӧста шуны: «Вӧр-ваыд – тайӧ вердысь-удысьыс миян».